

弘

簡

錄

弘簡錄卷之十四

明刑部員外郎仁和弘齋邵經邦學

皇清翰林院侍講學士四世孫遠平校閱

宰輔 唐二之三

裴炎從子劉稭父子翼魏元忠韋安石王方慶孫

韋思謙子陸元方子象先景王及善父君偁

婁師德李昭德父乾杜景佺李懷遠蘇味道

李嶠李迥秀李日知豆盧欽望張光輔周九元

裴炎字子隆絳州聞喜人為人寬厚寡言笑有奇節補弘文生
專意讀書不事游謁服勤十年通左傳漢書擢明經第補濮州
司倉參軍歷侍御史起居舍人遷黃門侍郎調露二年同中書
門下三品進侍中永淳元年高宗幸東都留炎調護太子守京

師明年帝不豫太子監國詔與劉齊賢郭正一於東宮平章政事及大漸受遺輔立中宗改中書令故時政事堂在門下省至炎徙中書省中宗欲以后父韋玄貞爲侍中及授乳媼子五品官炎固執不從帝大怒因與后謀廢立命炎泊劉禕之同羽林將軍程務挺張虔最勅兵入宮宣太后令扶帝下殿帝問我何罪報以天下與玄貞安得無罪乃定策更立豫王旦以功封永清縣男既而武承嗣請立七廟追王武氏先祖炎諫太后天下毋以盛德臨朝宜存至公不容追王祖考示已自私且獨不見呂氏事乎后曰呂氏之王權屬生人今追崇亡者事與絕異炎曰蔓草難圖漸不可長后不悅諸武又勸誅宗室近屬炎復固爭后愈怒未幾賜爵河東縣侯豫王雖立未嘗預政炎謀乘太后出游龍門以兵劫之歸政天子會久雨不出而止徐敬業起

兵方議討伐炎謂天子年長不豫政故暨子有辭今若復子明
辟賊不討而解御史崔營希意論炎親受顧托身總大權聞亂
不討乃請歸政此必有異圖后乃捕炎送詔獄遣御史大夫竊
味道御史魚承曄參鞠或勸令遜辭炎曰宰相下獄理不可全
卒不折節鳳閣侍郎胡元範特爲辨明謂炎社稷臣有功於國
悉心事上天下所知后不納元範申州義陽人介廉有才流死
高祖光宅元年十月斬炎都亭驛籍其家無僭石之蓄議者以
爲殺降人阿史那伏念等故及郎將姜嗣宗以炎事告劉仁軌
表以知炎反狀不告亦拉殺之睿宗立贈太尉益州大都督諡
曰忠從子伯先初蔭太僕丞坐流嶺南徙北廷專力居賄以
財自雄娶降蕃女爲妻有黃金駿馬牛羊養客數百調候京師
有補闕李秦授爲后謀讖言代武者劉請除之擢秦授考功員

外郎賜以墨詔伯先知之卽載金幣奔突厥又爲邏兵所執會
后自悔因得不死及求炎後授太子詹事丞歷秦桂廣三州都
督坐累及誅復賴張說僅免久之又起爲范陽節度使太原京
兆二尹進工部尚書年八十六以東京留守累封翼城縣公卒
于官 子彥先後亦至太子舍人

劉禕之字希美晉陵人祖興宗陳鄱陽王諮議叅軍父子翼字
小心隋著作郎遷祕書監素善吟詠有學行河東劉頴言甚重
之性不容非朋僚有短常面折之以峭直不欺故退無訾憾友
人李百藥稱之貞觀初詔追入京以母老固乞終養于家觀察
使李襲譽嘉其至孝資以粟帛表其門閭改所居爲孝慈里母
終除喪名拜吳王府功曹叅軍遷著作郎弘文館直學士預脩
晉書加朝散大夫卒高宗遣使弔贈給靈輿還鄉有集二十卷

祿之少與孟利貞高智周郭正一俱以文辭稱金直昭文館俄遷右史弘文館直學士上元中預撰列女傳臣執百僚新議樂書等兄懿之時爲給事中同居兩省人士多之有姊爲內官坐私省流雋州后丐帝召還除中書舍人儀鳳中轉切議大夫吐蕃寇邊帝訪侍臣所以處置之宜人人異謀祿之獨勸帝不足校惟願戢威紓百姓之急帝內其言俄拜相王府司馬帝知其居家孝友每得休祿散於親屬甚爲士族所稱故賴以師矩未幾后臨朝甚見親委豫王之立以嘗叅預其謀擢中書侍郎同中書門下三品賜爵臨淮縣男凡詔令獨出其手素以思致華嚴裁可占授未嘗停滯有司門郎房先敏坐累貶衛州司馬詣宰相訴寢味道謂曰太后旨祿之曰緣坐改官多從有司奏請后聞以味道歸怨於上貶青州刺史加祿之大中大夫賜物百

段馬一疋后方賞其竭忠無何與鳳閣舍人賈大隱私語后既廢昏立明何用自攬朝權不如反政新主以安天下之心大隱密奏其言后怒以爲近者朕親引用乃有背我之心深爲可惡會有告其受都督孫萬榮金兼與許敬宗妾有私后乃口語肅州刺史王本立推鞠其事本立宣示勅語褱之以爲不經鳳閣鸞臺何名爲救后大怒責其非捍制使下之獄帝爲抗疏申理姻友咸謂必獲見原自慶太后威福由已而帝營救是速吾禍也乃上疏自陳賜死于家年五十七臨終洗沐神色自若命其子執筆占遺表子號絕不能書因自捉筆詞欬切到見者哀之睿宗立贈中書令有郭翰者爲人性寬簡嘗爲御史巡察隴右多所按劾次寧州獨薦狄仁傑讀老子至和其光同其塵慨然辭憲職改麟臺郎及是與太子文學周思鈞尤雍悵后惡之貶

翰巫州思鈞播州皆叅軍

魏元忠宋城人初名真宰志氣倜儻入太學不調從蓋屋人江融學兵法融爲左史撰九州設險圖備載古今用兵成敗之事儀鳳中元忠上書言文武二道王者大事今言武者先騎射不稽之權畧言文者首篇章不取之經綸如養由基射能穿札不止鄧陵之奔陸機識能辨亡無救河橋之敗是知大將臨戎以智爲本漢高天度尚曰吾寧鬪智魏武神機猶云依法孫吳假令有項籍之氣秦皇紹之基業若泯智任情終以破滅魏用柏直以拒漢韓信輕爲豎子燕任慕容評以抗秦王猛謂之奴才豈非以中材之人素無智畧一旦居元帥之任焉知戎貽果毅敦詩悅禮之事乎故李信求以二十萬衆獨舉鄢郢果辱秦軍樊噲願得二十萬衆橫行匈奴登時見折後漢馬賢討西羌皇

甫規陳其必敗。宋文帝使王玄謨收復河南。沈慶之懸知不免。謝玄以書生拒符堅。郗超明其必敗。桓溫涉萬里襲成都。劉真長期於決取。雖時有古今。推之大體。觀其銳志與識畧耳。今之用人。類將家子。或死事孤兒。進非幹畧。而意氣軒昂。自謂當其鋒者。無不摧碎。卒不免於傾敗。且建功者。言其所濟。不言其所求。言其所能。不言其所藉。若陳湯。呂蒙。馬隆。孟觀。悉出貧賤。勲伐甚高。不聞其家世將帥也。故陰陽不和。握土爲相。蠶貊不廷。擢校爲將。當今豈盡無卓越之士哉。而薛仁貴。郭待封。至棄甲喪師。脫身以免。國家寬政。罪止削除。夫賞不勸。謂之止善。罰不懲。謂之縱惡。今罰旣不行。賞復難信。自蘇定方。平遼東。李勣破平壤。皆虛立賞格。大臣惜於大體。恐資勲庸。竭府庫。留意錐刀。以爲益國。甚者冒立僞勲。達于省府。未聞有所懲艾。昔貞觀中。

萬年尉司馬玄景舞文飾智。太宗棄之都市。後征高麗。總管張君父不進擊賊。斬之旗下。臣以爲僞勲之罪。多於玄景。仁貴等敗。重於君父。陛下過於父慈。下多敗子。臣恐邊境之平。未可以旦夕望也。凡人識不經遠。皆言吐蕃戰前隊盡。後隊方進。臣以爲吐蕃之望中國。猶孤星之對太陽。大小明晦。自不能移。雖禽獸亦知愛其生。豈肯前盡死而後進哉。向使能殺敵。橫尸蔽野。歛其頭顱。以爲京觀。則此寇聞官軍鐘鼓。望塵卻走。何暇前隊皆死哉。高宗善之。授祕書正字。直中書省。仗內供奉。遷監察御史。帝嘗從容問朕何如。王對曰。周成康漢文景也。然則有遺恨乎。曰。有之。王義方一世豪英而死。韋萊議者謂陛下不能掄材。帝曰。我適用之。聞其死。顧已無及。又曰。劉蕡詣行。副於才。陛下所知。今七十爲郎。徒歎彼而又棄此。帝默然。慙遷殿中侍御史。

命監李孝逸軍討徐敬業至臨淮未敢前督曰公以宗室將兵天下安危繫焉今海內傾耳翹心以待狂狡之誅若不速進使遠近解情萬一朝延代以他將公且何辭孝逸然之乃部分進討時敬業保下阿谿弟敬猷屯淮陰咸請先擊下阿元忠曰不然賊勁兵盡守下阿利在一次苟有負大事去矣敬猷博徒不知戰且其兵寡易搖大軍臨之勢無不克敬業畏直擄江都必將邀我中路吾乘勝進破之必矣孝逸如言引兵擊淮陰敬猷脫身遁遂擊敬業平之還授司刑正遷洛陽令周興陷於獄以功貸死流貴州歲餘起爲御史中丞來俊臣復構將刑又免流費州頃還仍授中丞又陷侯思正獄放嶺南酷吏誅始免聖曆二年拜鳳閣侍郎同平章事以清正著名遷左肅政臺御史大夫兼洛陽長史張易之家奴暴百姓笞殺之權豪憚服歷并州

長史隴右諸軍大使天兵軍靈武道行軍大總管以討吐蕃禦
突厥所至馭軍持重雖無赫然功未嘗敗北中宗在東宮除左
庶子奏言臣承先帝之顧且受陛下厚恩不能徇忠使小人在
側臣之罪也易之等恨怒因后不豫譖與司禮丞高戢謀挾太
子爲耐久朋下制獄詔太子相王及宰相廷辨不能決昌宗引
張說爲證說初許之至后前迫使言狀不應后又促之對曰臣
不聞易之等遽稱說與同逆襲嘗謂元忠爲伊周夫伊尹放太
甲周公攝王位此反狀明甚說曰汝安知伊尹周公歷古以爲
忠臣陛下不遣學伊周將何効焉今臣知附易之朝夕可富貴
從元忠則族滅然不敢面欺后悟得貶高要尉中宗召爲衛尉
卿同中書門下三品不閱旬遷兵部尚書進侍中帝后喪軍
國事悉委裁可拜中書令封齊國公神龍二年進右僕射謁告

上冢詔宰相諸司長官祖道上東門賜錦袍給千騎四人侍賜銀千兩到家無所賑施及還帝幸白馬寺迎勞之安樂公主請廢太子求爲皇太女帝以問元忠對曰公主爲太女駙馬當何名主語乃塞時天下傾望幹正王室而元忠稍憚權幸渤海高軫上書言三思過惡帝撈殺之不能救王同皎謀誅三思被族又依違無所建明由是譽望大減陳郡男子袁楚客以書規之且言朝廷十失其一國無太子朝野不安其二公主問府置吏以女處男職其三度人旣多不本行業專附權門昔之賣官錢入公府今之賣度錢入私家其四倡優輩授官非次其五有司選士非賄卽勢正蹈葛洪之言舉秀才不知書察孝廉濁如泥高第賢良客如蠅望舉正之其六閹宦昇朝旣無正門率授員外綰青紫耗府藏至盈千人前車後誠不可不慎其七公主賞

領庫藏造竭府資疏築臺沼。崇峙觀廡。終歲不絕。其八。天下困窮。州牧縣宰。非以選進。割剝自私。人不聊生。其九。先帝宮嬪。近封數夫人。令得出入禁掖。內外傳言。弄法不禁。其十。左道惑主。據非才之地。食非德之祿。凡此十失。君侯不正。誰與正之。元忠得書。益慙。會節愍太子起兵。誅三思。與聞其謀。其子太僕少卿昇從戰永安門。已而被殺。帝護其功。置不問。宗楚客紀處訥固請夷其族。乃不自安。上政事。以特進齊國公致仕。朝朔望。楚客等引右衛郎將姚廷筠爲御史中丞。暴奏反狀。貶渠州司馬。楊再思冉祖雍復奏不宜處內地。御史袁守一固請行誅。貶務川尉。行至涪陵。卒年七十餘。景龍四年。贈左僕射。齊國公睿宗詔陪葬定陵。賜其子冕實封一百五十戶。開元六年。謚曰貞。

開曰陰兵暗屠蠹賊內起嗟嗟唐臣鞠爲胥靡

韋安石京兆萬年人。曾祖孝寬。周大司空。即國公。祖津。隋民部侍郎。守洛陽。拒李密爲所禽。密敗。復歸洛。與高祖素善。平王世充。授諫議大夫。檢校黃門侍郎。終陵州刺史。父琬。成州刺史。安石舉明經調。乾封。尉轉雍州司兵參軍。蘇良嗣器之。薦于武后。擢膳部員外郎。歷永昌令。并州司馬。性方重。不苟言笑。其政尚清嚴。吏民尊畏。手制勞問。歷德鄭二州刺史。久視中。遷文昌右丞。以鸞臺侍郎同平章事。兼太子左庶子。并侍讀。尋知納言事。數折辱權倖。嘗跪奏蜀商宋霸子等賤類。易之。不當引戲殿上。顧左右引出。坐皆失色。后憚其辭正。改容慰勉。同列陸元方自謂不及。稱爲真宰相。后欲趨捷道。幸興泰宮。奏以板築初成。未爲牢固。后爲回輦。長安二年。同鳳閣鸞臺三品。舉奏易之等罪。狀有勅追問。未竟而事變。遂罷政事。出爲揚州長史。神龍元年。

徵拜刑部尚書又轉吏部復知政俄遷中書令兼相王府長史以宮恩封鄖國公賜封戶三百尋加特進至侍中元夕帝與后幸其第資賜不貲又幸安樂公主園池主請御船諫止睿宗踐祚改封鄖國進開府儀同三司太平公主屢遣子壻唐駿邀引同預密謀拒不在睿宗密語聞有言欲傾東宮令察之對曰此必太平之謀太子仁孝且有大功陛下安得徇亡國語帝矍然曰卿勿言朕知之主竊聞乃構飛變欲風之賊郭元振保護免俄遷右僕射兼太子賓客留守東都中丞張茂謙劾其妻笞殺嬖婢下遷蒲州刺史以拒姜皎私請怒之皎弟中丞晦諷御史舉發爲相時宗楚客韋溫擅削相王輔政無所建正貶沔州別駕皎又奏護作定陵有所盜沒詔籍其賊乃發憤卒年六十四
玄宗贈左僕射鄖國公謚文貞

王方慶名祿以字顯其先世閩閩自琅琊南渡居丹陽曾祖褒周少司空封石泉公徙咸陽祖鼎隋衛尉丞父弘直任漢王元昌友上書諫王敗游被斥後終荆王友方慶起家越王府叅軍受班馬二史於記室任希古侍以卒業尤精三禮永淳中遷太僕少卿武后臨朝拜廣州都督不受請謁政平訟理市舶貨歲至秋毫無所預約束官屬不得擅相交通犯者痛繩以法由是境內清肅入唐推爲第一下詔褒美賜瑞錦雜綵以彰其善轉洛州長史歷鸞臺鳳閣二侍郎同平章事神功初總管武攸宜獻俘議者以孝明帝忌月請備鼓吹設而不作方慶奏禮有忌日無忌月若有忌月卽有忌時忌年益爲無理臣謂軍方大凱作樂無嫌詔可后幸玉泉祠以道險欲御腰輿前奏漢元帝乘船張猛尚欲就橋今山阿危峭陞道曲狹比於樓船又甚陛下

奈何輕踐畏塗哉。后爲罷行。又因明堂成禮。官議准惟歲首一
入行告朔之禮。謹按先儒舊說。天子行事。一年十八度。入明堂
大享一入。每月告朔十二入。四時迎氣四入。巡狩之年一入。與
今禮官議異。臣不敢雷同。貞觀顯慶禮及祠令。不言告朔者。蓋
爲歷代不傳其文。乃闕不足。依據后從之詔。每月一行。又奏令
期及大功喪未葬。不聽朝賀。未除弗豫。享宴止。羣臣不遵下詔。
中書后嘗就竟遠祖義獻墨蹟。因併上十一代祖尊十代祖洽
九代祖珣八代祖曇首七代祖僧綽六代祖仲寶五代祖壽高
祖規曾祖褒等凡二十八人書后御武成殿。詔中書舍人崔融
序次號寶章集。以老乞身。改麟臺令。封石泉公。其子方爲眉州
叅軍。后問君在相位。何子之遠。欲以感動后意。對曰。比之廬陵
王。臣子當在近。中宗復皇太子。拜左庶子。兼侍讀。后欲季冬講

武有司不時辦改用明年孟春方慶奏兵金也能勝木方春木
王而舉金以害盛德逆生氣願陛下不違時令待及孟冬以順
天道手制褒允東宮門殿多觸嫌名請一改之以示復辟之漸
長安二年薨贈兗州都督謚曰貞景龍中贈吏部尚書爲人博
學諳練朝章著書二百餘卷及門學者每有咨質酬復淵詣次
爲雜禮答問聚書不減祕府及圖書皆異本于光輔開元中官
至潞州刺史少子駿工書善琴棋性嚴整官至殿中侍御史
孫甫字靈龜擢明經調莫州叅軍辟范陽張守珪幕府值契丹
加烈部將謀入寇河北騷然至則脅說禍福寇患乃息歷博陵
常山二郡太守祿山反副河北招討卒贈太常卿自襄至甫六
世皆襲石泉公

韋思謙名仁約以字行本出杜陵後客襄陽更徙爲鄭州陽武

人八歲喪母以孝聞及第調應城令尚書高季輔自慶居選部
方得此人擢監察御史性狷直敢言觸幾輒發明目張膽思報
主恩不暇完身以保妻子論劾褚遂良市地不如直左授同州
刺史復相出爲清水令雖被謫譴州縣震懼以爲動搖山岳左
肅機皇甫公義引爲倉曹叅軍改侍御史高宗每召與語徙倚
軒檻數刻尚不知倦有疑獄劇事多與參裁武侯將軍田仁會
誣奏御史張仁棹帝廷詰以畏懦不能自理思謙歷階而進辨
其欺罔陷人不測詞旨明暢賴以不惑遷右司郎中尚書左丞
振明綱轄朝廷肅然嘗奏陛下爲官擇人今不惜美錦令臣裁
製此陛下知臣之深亦微臣盡命之日俄進御史大夫議論譽
謗顏色莊重一毫不可犯見王公未嘗屈禮有譏者苦曰耳目
之官固當特立鵬鵬豈衆禽之偶奈何設拜以卽之帝崩

扶疾入臨幄伏號絕天后臨朝轉宗正卿官名改爲司屬卿復
任右肅政大夫故事與御史鈞禮及是坐受不答或以爲疑論
曰班固自有差等奈何尚姑息邪垂拱初封博昌縣男同鳳閣
鸞臺三品踰年轉納言辭疾不許詔肩輿以朝聽子孫扶持三
年加大中大夫致仕卒於家贈幽州都督子二長承慶字延
休性謹畏事繼母能爲孝擢第補雍王府叅軍掌文翰辭藻
之美擅于一時王爲太子遷司議郎上書極諫太子願損聲色
罷土功節玩好勿與倡優鼓吹戶奴小人款狎恐因是作威福
宜加繩察續進諭善箴太子善之賜物頗厚又著靈臺賦譏揣
當世亦自廣其志謂人所以混濁浮擾本之於心辭多不載太
子廢出爲烏程令政治有績風化大行長壽中遷鳳閣舍人屬
文敏捷大小詔令曾無留思坐失大臣意出沂州刺史未幾復

職明堂災疏諫文明垂拱後執政者未滿歲率以惡逆不道坐
罪罷去夫構大廈濟巨川必擇文梓餘艘若用朽木乘膠舟是
以亟毀而敗也臣謂陛下求賢之意切而取人之路寬故一言
有合卽付大任夫以堯舉舜猶歷試諸難况庸庸者可超處輔
相以百揆萬機昇之哉書聞不報久之病免改太子諭德歷豫
虢二州刺史有善政制書褒美轉天官侍郎兼脩國史自天授
以來三掌選事銓授平允議者公之長安中拜鳳閣侍郎同平
章事會誅張易之衆議草赦令咸推承慶召使爲之無撓色援
筆而就辭甚典美當時咸嘆服之以素附麗不安免冠待罪配
流嶺表歲餘召爲祕書少監以脩天后實錄功封扶陽縣子又
撰后紀聖文選黃門侍郎未拜而卒中宗傷悼贈禮部尚書諡
曰溫子長裕膳部員外郎次嗣立字延構繼母所生少友悌

學行與兄齊名。每承慶被管解衣求代。世以比之王覽。第進士。調雙流令。政有殊績。爲兩川最。武后嘗召謂曰。爾父稱二子忠。孝。堪以事朕。比兄弟稱職。如而父言。今使卿代兄。爲鳳閣舍人。上疏極陳。自永淳後。庠序廢毀。胄子衰缺。輕儒學之官。弛章句之選。貴閭後生。以微倖升。寒族平流。以替業去。及垂拱閒。仕入。繡多。公行私謁。選補逾濫。經術不聞。猛暴相誇。陛下誠下明詔。追三館生徒。敕王公以下子弟。皆入太學。尊尚師儒。發揚勸獎。海內知嚮。然後審昇銓。總各程所能。以之臨人。則官無曠。民樂業矣。頃者大獄屢興。豪猾伺閒。陰相影會。搆似是之言。恣行楚。慘類自誣服。王公士人。至連頸就戮。道路藉藉。咸知其非。而鍛鍊已成。不可翻動。小則身誅。大則族滅。相繼共坐。庸可勝逆。彼皆報復讐嫌。苟圖求賞耳。臣願陛下廓天地之量。施雷雨之仁。

取垂拱以來罪無重輕所不赦者。普皆原洗。死者還官。生者霑恩。則天下曉然知向所陷罪非陛下意也。長安中拜鳳閣侍郎。同平章事。父子兄弟四相交代。並爲宰相。世罕其比。后以州縣多非人。責宰相李嶠。唐休璟曰。朝廷重內輕外。每除牧守。皆訴不行。有過累方受遣。請選臺閣近臣分典大州。嗣立先請行。后悅。以本官檢校汴州刺史。未幾徙魏洛二州。坐善二張貶饒州長史。轉相州。復入爲黃門侍郎。歷太府卿。脩文館大學士。景龍中拜兵部尚書。同中書門下三品。建昌崇飾寺觀。用度百出。又恩作食邑一封。分食數州。凡五十四封。悉據天下膏腴。至安樂太平。仍取高貲多丁家。無復平民。凡遇水旱軍興。不能資給。請一切停封徵稅。帝不聽。詔附韋后屬籍。顧待甚渥。營別第驪山。鸚鵡谷。帝臨幸。命從官賦詩。御製序文。因封爲逍遙公。名所居弘簡錄。

曰清虛原幽棲谷后收當死寧王救免睿宗拜中書令定策有功賜封百戶旬日出爲許州刺史徙汝州開元初入爲國子祭酒兼太子賓客坐不執正宗楚客等削遣制事貶岳州別駕再徙陳州刺史巡察使表其廉欲復用會卒年六十六贈兵部尚書謚曰孝三子長孚左司員外郎次恒次濟皆知名

陸元方字希仲吳人世爲著姓曾祖琛陳給事中至黃門侍郎伯東之太子司議郎善書名家元方初舉明經後應入科皆中累轉監察御史武后革命使安戢嶺外方涉海風濤驚起舟人危懼自度受命不私神豈害我趣使舉帆遂濟使還除殿中侍御史踰月擢鳳閣舍人判秋官侍郎長壽二年遷鸞臺侍郎同平章事坐附會李昭德貶絳州刺史尋歷春官天官侍郎兼司衛卿薦其友崔玄暉有宰相才或言陟於親黨后怒免官令白

衣領職薦人如初名讓之對曰舉臣所知不暇問讐黨后知其
無他復令知政如故又嘗問外事對臣備相位大事當奏若民
間碎務不敢以聞由是忤旨責授太子右庶子終文昌左丞贈
揚州大都督爲人素清慎積前後詔勅并奏稿謹藏一匣不以
示人臨終悉焚之凡進退羣臣及后所訪問外祕莫知自言吾
當壽但領選久耗傷吾神幸陰德在人後當有與者五子皆有
美譽僧一行推之以比古之荀陳象先始名景初自少器識
涉遠才望高雅制舉高第爲揚州叅軍父方領選同列吉瑱擢
爲洛陽尉辭不受瑒曰爲官擇人豈以吏部子廢至公平卒以
授之俄遷監察御史轉殿中侍御史累授中書侍郎景雲初太
平公主謀引崔湜爲相湜讓象先主不得已爲言進同中書門
下平章事監脩國史與湜並知政事素性恬靜寡欲雖公主權

重一時未嘗往謁復以議論高簡爲時所稱。湜嘗推之曰。陸公加於人一等。及公主逆謀。召宰相議曰。寧王長不當廢嫡立庶。象先問所立爲何。主曰。一時之功。對曰。立以功者。廢必以罪。今不聞天子過失。安敢言廢。主怒。玄宗聞之。嘆曰。歲寒然後知松栢之後凋也。由是獨得免死。先天二年。復論保護功。封竟國公。封賞二百玄宗以難作時。睿宗御承天樓。麾群臣集者曰。助。以。者。言。者。去。於。是。有。甚。名。自。驗。者。事。平。詔。象。先。收。按。慰。而。悉。英。之。上。大。怒。武。弄。加。罪。頓。首。謝。曰。赴。君。之。難。忠。也。陛下。方。以。德。化。天下。故。臣。違。命。欲。以。安。反。側。者。帝。悟。善。之。又。窮。治。至。忠。等。黨。與。復。密。爲。申。救。保全。甚。衆。然。未。嘗。洩。漏。故。當。時。無。知。者。其。年。罷。爲。益。州。長。史。在。官。久。務。以。仁。恕。爲。政。不。峻。朴。罰。以。示。威。蜀。人。大。化。徙。蒲。州。刺。史。歷。劍。南。河。東。按。察。使。小。吏。有。罪。輒。誠。遣。之。嘗。言。

天下本無事。祇是庸人擾之。始爲煩耳。第澄其源。何憂不治。故所至民吏懷之。入爲太子詹事。歷戶部尚書。知吏部選事。母喪免起。爲揚州大都督府長史。遷太子少保。卒年七十二。贈尚書左丞相。謚曰文貞。弟景倩爲扶溝丞。河南按察使。畢構覆州縣。最欲必得實。有吏言狀曰某。疆清某詐。清惟景倩曰真。清終監察御史。景融長七尺。偉姿度。博學工筆札。以蔭補千牛。轉新鄭令。政有風績。累遷工部尚書。東京留守。卒。贈廣陵郡都督。景融於象先後母弟也。象先被笞。景融諫不入。則自楚。母爲損威人。多其友。

王及善。洛州邯鄲人。父君愕有沈謀。隋亂并州。人王君廓掠邯鄲。君愕往說曰。隋氏失御。豪傑並起。宜撫遺趾。觀時變。以待真主。足下無尺寸之地。兼旬之糧。劫衆而興。但恣殘剽。所遇失望。

竊爲足下羞之。君廓謝曰計安出。答曰井陘之險可先取。君廓從其言。遣屯井陘。山高祖入關。與君廓偕來。拜君愕大將軍。封新興縣公。累遷左武衛將軍。從太祖征遼。領左屯營兵。與高麗戰。駐驛山。死於陣。贈左衛大將軍。幽州都督。邢國公陪葬昭陵。及善以父死事。授朝散大夫。襲邢國公爵。皇太子弘立。擢及善左奉裕。率太子宴於宮。命宮臣擲餅。及善辭曰。殿下自有優人。臣苟奉命。非羽翼之美。太子謝之。高宗聞。賜絹百匹。除右千牛衛將軍。謂曰。以爾忠謹。故擢三品要職。病免。召爲衛尉卿。垂拱中。歷司屬卿。山東饑。詔爲巡撫。賑給使。拜春官尚書。出爲秦州都督。益州長史。加光祿大夫。以老病致仕。神功元年。契丹擾山東。擢魏州刺史。武后勞曰。逆寇盜邊。公雖病。可強行。日三十里。爲朕卧治。爲屏蔽也。因延問朝政得失。及善陳治亂所宜。后悅。

曰禦寇末也輔政本也公不可行遂留拜中書令來俊臣繫獄
當死后欲釋不誅因請曰俊臣凶狡不道引亡命汙戮善良天
下疾之不剝絕元惡搖亂胎禍憂且未既后納之廬陵王之還
密贊其謀既爲皇太子又請臨外朝以安羣臣及善爲人不甚
文而清正自將臨事不可奪有大臣節嘗侍宴惡二張怙寵無
人臣禮數裁抑之后不悅曰卿年高不宜在此自後但檢校閣
中印移病月餘后不復召歎曰宰相可一日不見天子乎堅乞
骸骨不許改文昌左相同鳳閣鸞臺三品卒年八十二贈益州
大都督謚曰貞陪葬乾陵

裴師德字宗仁鄭州原武人身長八尺方口博唇學行俱美第
進士調江都尉長史盧承業見其寬厚長者尊爲台輔器不用
僚屬禮待托以子孫上元初爲監察御史劉審禮敗命收亡卒

於洮河吐蕃首領論贊麥等自赤嶺操牛酒迎勞喻以國之威
信開陳利害蕃相畏悅後又從軍攻討高宗假朝散大夫以行
有功遷殿中侍御史兼河源軍司馬并知營田事與敵戰白水
洲八遇九克天授初擢左金吾將軍兼豐州都督恭勤接下孜
孜不息率士屯田積穀數百萬兵以饒給無轉餽和糴之費后
降璽書勞之長壽九年召爲夏官侍郎判尙書事后嘗語以師
在邊必待營田公不可以劬勞憚乃復授河源積石懷遠等軍
河蘭鄯廓等州檢校營田大使入遷秋官尚書爵原武縣男改
左肅政御史大夫知政事樸忠自負心無適莫證聖中與王孝
傑拒吐蕃於洮州敗績貶原州司馬萬歲通天二年起爲鳳閣
侍郎同平章事又偕武懿宗狄仁傑分道撫定河北諸州神功
元年拜納言更封譙縣子隴右諸軍大使復領營田聖曆三年

突厥入寇詔爲并州長史充天兵軍大總管卒于會州年七十
贈幽州都督謚曰貞喪葬往還皆給儀仗自總邊要爲將相三
十年方重有度喜怒不形于色人有忤已輒遜以自免李昭德
悲爲田舍子笑曰吾不爲田舍當復何人其弟守代州辭之官
教以耐事弟曰自今人有唾其面潔之乃已荅曰未也潔之是
違其怒正使自乾耳在夏官注選或就案閱簿拒之不止乃灑
筆曰墨汗爾衣嘗薦仁傑引與同列輔政後仁傑數擠令外使
后覺之一日問以師德賢乎仁傑曰爲將謹守賢則不知又問
知人乎對曰臣嘗同僚未聞其知人也后曰朕用卿由師德所
薦誠知人矣因出其奏仁傑大慙歎曰婁公盛德我爲所容以
今觀之不逮遠矣后方臨御酷吏殘鷙人多不免獨能深懷畏
避以功名始終與郝處俊相亞世稱婁郝

李昭德長安人父乾祐貞觀初爲監察御史太宗怒裴仁執私役門卒欲斬之賴爭而止遷侍御史母卒廬墓側負土成墳帝遣使就弔表異其間歷治書侍御史有能名永徽初擢御史大夫褚遂良惡之出歷邢魏二州刺史爲人強直而昵小人嘗爲書與所善吏刺取朝廷事述隱其辭爲人所發坐流驩州召拜滄州刺史入爲司刑太常伯又坐漏禁中語免官卒昭德性魁幹有父風擢明經累官御史中丞永昌初坐事貶振州陵水尉還爲夏官侍郎如意元年拜鳳閣侍郎同平章事後營神都創文昌臺定鼎上東諸門又城外郭皆委以創制標格華壯人稱其能天津東有二橋其一直長夏門歲爲洛水淙齧繕者告勞昭德創意累石代柱銳其前斫殺水勢賴以無患俄檢校內史薛懷義討突厥表爲行軍長史不見賊還密奏武承嗣任左相

典機衡以親則姪以貴則王且父子猶相奪况姑姪乎后嬰
然曰我未之思乃罷政事徙太子少保洛陽人王慶之又請立
承嗣爲太子后遣昭德詰問答殺之因奏天皇陛下之夫皇嗣
陛下之子若立承嗣兄天皇不來食矣后乃止承嗣恨嘗譖毀
之后口吾任昭德每獲安枕非而所知時忌言反狀進諛者日
益甚有謬言洛水旁得白石中有赤文詣闕來獻昭德叱之曰
汝言此石赤心豈餘石皆反者邪左右皆笑酷吏來俊臣棄故
妻叔太原王慶說女侯思止又請索趙郡李自拙女坐以罪榜
殺思止其黨稍沮俄爲魯王府功曹叅軍丘悅論劾指爲專權
用事臣觀其膽乃大於身鼻息所衝上拂雲漢歸美引咎陰相
傳會又果殺鄧汪著石論數千言述其專恣鳳閣舍人逢弘敏
以聞后惡之貶欽州南賓尉俄召授監察御史俊臣復誣以逆

謀既而一併下獄同日被誅遇天大雨衆庶莫不冤昭德而快
俊臣神龍二年贈左御史大夫建中三年加贈司空

杜景佺初名景儉冀州武邑人性嚴明中明經舉累遷殿中侍
御史出爲益州錄事叅軍時隆州司馬房嗣業轉除本州書未
到卽欲視事先答責吏以示威景佺笑曰公雖降旨尚未受命
何急數日祿耶嗣業怒不聽景佺叱吏散去旣乃除荊州司馬
人爲語曰錄事意與天通州司馬折威風由是知名入爲司賓
主簿轉司刑丞與徐有功治詔獄不爲苛虐時稱遇徐杜必生
遇來侯必死改秋官員外郎同陸元方按員外侯味虛罪已推
輒釋之武后怒其不待報元方大懼景佺獨曰陛下明詔六品
七品官文辯已定待命于外今雖欲罪臣奈明詔何后以爲守
法擢鳳閣舍人遷洛州司馬延載元年檢校鳳閣侍郎同平章

事時季秋后出梨華一枝以示宰相問是何祥衆咸賀曰陛下德被草木故秋再華雖周家仁及行輩無以過也景佺獨曰陰陽不相奪倫漬卽爲災今當黃落而乃復華漬陰陽也竊恐陛下布德施令有所虧紊臣位宰相受理無狀過咎何辭頓首請罪后笑曰真宰相也會救李昭德下獄以爲面欺左遷秦州刺史入拜司刑卿聖曆元年復除鳳閣鸞臺平章事契丹入寇陷河北數州已去武懿宗欲盡論殺從罪景佺奏謂可原后從之罷爲秋官尚書坐漏省內語降司刑少卿出爲并州長史道病卒贈相州刺史子澄頗以文學著名官華縣尉

李懷遠字廣德邢州柏仁人本山東著姓少孤皆學善屬文宗人欲藉以蔭固辭退以爲恥應四科舉擢第累轉司禮少卿出爲冀州刺史徙同州遷揚益二都督府長史治尚清簡入爲左

庶子兼太子賓客累右散騎常侍長安元年遷鸞臺侍郎同平章事歲餘加銀青光祿大夫封平鄉縣男歷秋官兵部二尚書同中書門下三品進金紫階爵趙郡公賜實封戶三百以老致仕中宗還京召知東都留守雖久居榮貴而彌尚素樸園林居第無所改作所乘故欵段馬時議嘆美之卒帝賜錦衾以歛自爲文祭之贈侍中謚曰成

蘓味道趙州樂城人九歲能文與李嶠齊名時號蘓李冠州舉中第調咸陽尉裴行儉稱之會征突厥引管書記裴居道進左金吾階託爲謝表攬筆而就開微清密盛傳於代延載中任鳳閣舍人俄檢校鳳閣侍郎同平章事歲餘爲真證聖元年坐法繫獄席地飯蔬爲危惴可憐狀后聞降集州刺史未幾召爲天官侍郎聖曆初復同鳳閣爲臺三品更葬其親有詔州縣治喪

事因庸役過程侵毀人墓蕭至忠劾之貶坊州刺史遷益州長史坐黨附張易之復貶眉州刺史還道卒年五十八贈冀州刺史爲人善敷奏練達臺閣故事前後爲相特具位未嘗有所發明脂韋自營而已常謂人曰決事不用明白誤則有悔但模稜持兩端可也故世號蘓模稜性友愛其弟味玄爲太子洗馬請託不行輒加面折怡然不以爲忤有文集行于時

李嶠字巨山趙州贊皇人隋內史侍郎元操從曾孫代爲著姓父鎮惡襲城令嶠早孤事母以孝聞兒時夢人遺之雙筆白是漸仆父辭十五通五經薛元超稱之二十擢第調安定尉復舉制策甲科轉長安丞授監察御史時嶺南邕巖二州獠叛高宗詔監軍事親入獠洞傳上旨招喻降之罷兵而還上嘉之遷給事中武后時來俊臣構狄仁傑李嗣真裴宣禮等獄將抵死敕弘衡錄

嶠與大理少卿張德裕侍御史劉憲覆驗二人內知其冤不敢
與嶠謂見義不爲卒列其枉由是忤旨出爲潤州司馬久乃召
爲鳳閣舍人令主朝廷文冊大號垂拱初置右御史臺察州縣
吏善惡風俗得失每以三月出盡十一月奏事上言諸道巡察
使科條四十四別敕令又三十每道所察吏多者二千少亦千
計要在品覈才行而褒貶之今期會迫促奔逐不暇欲望詳究
所能不亦艱哉臣願量其功程以爲節制使噐周於用力濟於
時然後得失可以精覈且朝廷萬機常在四方不必多張事目
但準漢六條而推廣之則無不包請率十州置一御史外州之
事悉得專之以期歲爲之限容其身到屬縣督察采訪然後課
其成功孰敢不盡力効死哉后善之下制析天下爲二十道擇
堪使者爲衆議沮止俄知天官侍郎事進麟臺少監同鳳閣鸞

臺平章事兼脩國史以張錫親嫌罷爲成均祭酒俄檢校文昌
左丞長安三年復知納言遷內史坐附張易之貶通州刺史轉
豫州中宗召爲吏部侍郎爵贊皇縣男俄遷尚書進封縣公陰
欲藉時望復相位奏置員外官數千神龍二年加中書令吏旣
倍多府庫益耗乃抗表引咎辭職冀蓋前非并陳利害十餘事
中宗不許手詔詰讓憚惶恐復視事三年加脩文館大學士監
脩國史封趙國公景龍三年罷爲特進同中書門下三品睿宗
立下除懷州刺史致仕中宗崩時密表請出相王諸子不宜留
京師玄宗靖難獲之請加誅張說解以犬各吠主不宜追罪况
數更赦遂免貶滁州別駕聽隨子虔州刺史楊之官復起爲廬
州別駕卒年七十生平富才思著文集五十卷有所屬綴人多
傳諷與王楊盧駱劉光業崔融先後驅駕晚諸人沒獨爲文章

宿老一時學者取法焉。然以媚武后。上皇符一篇。世譏薄之。

冊曰文士齷齪。誠若此流。我有好懷。不相爲謀。

李迥秀。族祖大亮。祖玄明。濟州刺史。父義本。宜州刺史。迥秀少聰悟。弱冠。中英才傑出科。調相州參軍。武后愛其材。轉考功員外郎。取媚張易之兄弟。遷鳳閣舍人。掌選數年。長安初。檢校夏官侍郎。仍領銓選。號爲稱職。進同鳳閣鸞臺平章事。俄坐貶廬州刺史。易之誅。再貶衡州長史。中宗召授將作少監。遷鴻臚卿。兼脩文館學士。出爲朔方道行軍大總管。還拜兵部尚書。卒。年五十。贈侍中。爲人雅有文才。善飲好譔。廣接賓朋。時稱風流之士。母少賤。因妻崔氏。晉媵婢。聞而不樂。卽出之。武后嘗遣內人叅問其母。迎置宮中。待遇甚優。中宗時。所居堂產芝草。以爲孝感。旌其門。

李日知鄭州滎陽人登進士天授中歷司刑丞時尚嚴酷獨平
寬無文致嘗與少卿胡元禮爭囚死元禮曰吾不去囚無生理
日知曰若僕不去囚無死法及讞狀后用日知議神龍初擢給
事中痛母老病未及封而卒鬚髮頓白方葬吏乃齎贈制殯絕
于道行路爲之感泣巡察使路敬潛表其孝服除累遷黃門侍
郎景龍初同中書門下平章事轉御史大夫仍知政事時安樂
公主館第落成中宗臨幸燕從官賦詩日知卒章獨寓規誡臨
淄王平內難授黃門侍郎同三品睿宗卽位追言嚮時雖朕亦
不敢諫非公挺直何能爾卽拜侍中先天元年罷爲刑部尚書
屢乞骸許之還籍不治產業惟飾臺池引賓客相與娛樂開元
三年卒諸子方總角皆通婚名族後無才者家法遂替

豆盧欽望雍州萬年人曾祖通隋相州刺史南陳郡公祖寬隋

文帝甥爲梁泉令高祖定關中率豪姓進款擢殿中監單姓盧氏貞觀中遷禮部尚書左衛大將軍封芮國公卒贈特進并州都督陪葬昭陵諡曰定仍復舊姓父仁業高宗時爲左衛將軍欽望則天時累官越州都督司賓卿長壽二年拜內史襲祖封以阿順李昭德不能執正附臣罔君貶趙州刺史復入爲司府卿遷秋官尚書中宗還東宮拜太子宫尹進文昌右相同鳳閣鸞臺三品俄罷爲太子賓客復位擢尚書左僕射平章軍國重事居位十餘年不能有所裁抑獨以淳謹守身自全而已進開府儀同三司檢校安國相王府長史卒年八十贈司空并州大都督陪葬乾陵諡曰元

張光輔京兆人自少明辯綽有幹才累遷司農少卿文昌右丞命討越王貞亂將士恃功多所求取時狄仁傑在豫州不爲應

付怒曰以一州將輕元帥耶仁傑曰亂河南者一越王耳今一
貞死萬良生光輔質其辭對曰明公董戎三十萬平一亂臣不
戢兵鋒縱其暴橫無罪之人肝腦塗地此非萬良而何且兇威
脅從勢難自固及天兵暫臨乘城歸順者萬計繩墜四面成蹊
公奈何縱邀功之人殺歸降之衆但恐冤聲騰沸上徹于天如
得尚方斬馬劍加於君頸雖死如歸光輔不能詰心甚銜之還
以功拜鳳閣侍郎知政事永昌元年遷納言旬日又授內史皆
有名坐與房嗣業張嗣明徐敬真交結稱其私說圖讖暗習天
文陰懷傾望被誅家口籍沒又貝州人周允元弱冠舉進士
累轉左肅政御史中丞除鳳閣鸞臺平章事嘗與諸宰臣侍宴
天后令各述書傳中善言允元諷以恥君不如堯舜三思科駁
以爲語有指斥后曰聞此言足以爲誠豈特將爲過耶證聖元

年卒后爲七言詩以傷之贈貝州刺史

弘簡錄卷之十四終

弘簡錄卷之十五

明刑部員外郎仁和弘齋何經邦學

皇清翰林院侍講學士四世孫遠平校閱

宰輔 唐二之四

狄仁傑

子光

張柬之

附李

桓彥範

敬暉

崔玄暉

袁恕已

唐休璟

張仁愿

崔湜

弟澈

蕭至忠

韋巨源

趙彥昭

父武

劉幽求

鍾紹京

崔日用

子宗之

郭元振

蘇瓌

子頤

說

張說

子均

狄仁傑字懷英并州太原人祖孝緒貞觀中尚書左丞父知遷

夔州長史仁傑自幼不凡方就傳適同門被事縣吏來訊尚誦

書不置吏問答曰黃卷中方與聖賢對何暇他顧吏異之長擢

明經訓汴州參軍黜陟使闕立本薦為海曲明珠東南遊覽轉

并州法曹性篤孝以親在河陽別業適登太行山見白雲孤飛
正當親舍左右瞻悵不能去久之雲移乃行後居母喪有白鵲
馴擾之祥同僚鄭崇質當使絕域其母老且疾謂曰君可貽親
萬里憂乎詣長史陶仁基請代行仁基咨美其誼嘆曰北斗以
南一人而已司馬李孝廉聞之增愧方與不平相待如初儀鳳
中遷大理丞歲中斷獄出滯囚萬七千人號稱平恕左威衛崔
善才右監門范懷義誤斧昭陵栢高宗命殺之執奏不應死上
怒曰是使我爲不孝子爭以釋之有言假令取長陵一抔土則
將何法以加帝寤免二人死除侍御史劾司農卿韋機營繕太
過其宿羽高山上陽等宮塼極壯麗竟坐免官又奏左司郎中
王本立怙寵自肆有詔原宥固執不可復抵罪一時朝著肅然
使岐州有亡卒剽行人官爲捕繫窮訊黨與道益不通乃明開

首原格使相諭曉皆自縛歸帝稱其達權變遷度支郎中幸汾陽宮爲知頓使韓道山妬女祠相傳盛服過者致風雷之變并州長史李冲玄發卒聞別道止之曰天子之行風伯清塵雨師灑道何妬女避耶竟亦無患帝聞壯曰真大丈夫哉俄轉寧州刺史撫和戎落得其歡心郡人勒碑以頌御史郭翰薦于朝徵拜冬官侍郎充江南巡撫使裁正祀典自夏母吳大伯季子伍員四祀之外一切禁罷凡經奏毀千七百所轉文昌右丞尋遷豫州刺史密疏越王貞支黨皆非本惡註誤至此有詔免死戍邊凡二千餘人道山寧州咸聚哭所立碑下燕三日乃去至流所亦爲立碑俄拒宰相張光輔奏其不遜左遷復州刺史徙洛州司馬有善政天授二年入爲地官侍郎同鳳閣鸞臺平章事后間有譖之者欲知之乎謝曰不願知誠有過臣當改后笑其

長者有太學生謁告后亦報可諫曰人君惟生殺柄不以假人若學徒取告丞簿職耳何足煩詔書爲定令示之而已后納其言未幾爲來俊臣搆捕送獄有例一問卽承聽減死對云大周革命萬物維新唐室舊臣甘從誅戮反是實判官王德壽令引楊執柔冀以爲功求進歎曰皇天后土使我爲此乎以首觸柱血流沫而德壽赧然于光遠上變書得名見與同被誣任知古等七族悉得貸死貶爲彭澤令萬歲通天中契丹陷薊州河北震動起爲魏州刺史時賊尚遠罷民城守悉就田作曰來則吾自拒之敵聞其名引去俄轉幽州都督后自製金字十二於紫袍併賜龜帶以旌其忠徵拜鸞臺侍郎復知政事時發兵戍疏勒四鎮怨苦固諫不納語甚剴切張易之嘗從容問自安計對曰惟勸迎廬陵王可以免禍會議立武三思爲太子衆率極莫

敢言仁傑前曰臣觀天人未厭唐德比匈奴犯邊陛下使三思募士踰月不及千人。廬陵王代之不決日輒五萬。今欲繼統非王莫可。后怒罷議。久之。后又問朕數夢雙陸不勝何也。與王方慶同辭對曰。雙陸不勝。宮中無子也。天意或者以儆陛下乎。且臣思之。姑姪與子母孰親。陛下立廬陵王。則千秋萬歲後常享宗廟。立三思。他日無附始于廟之理。后雖忤忍。忽感悟。卽日遣徐彥伯往迎王。潛至石墮王帳中。仁傑再三辭情辭切至。涕下不能止。后乃使王出口。還爾太子。仁傑頓首曰。外間尚未知何所取信於人。后乃復令出舍龍門。具禮迎還。中外大悅。尋拜納言兼右肅政臺御史大夫。聖曆初。突厥入趙定。出爲河北道行軍元帥。假以便宜契丹來侵。薦李楷固駱務整驍勇可用。請赦其罪。令感恩効節。及是獻俘舍樞殿后。賞其知人。更拜仁傑河

北安撫大使小民多脅從懼誅上疏民猶水也壅則爲淵疏則爲川通塞隨流豈有常性比由恩不溥治失在機先今潛匿之徒赦之則出不赦則逃山東群盜緣茲聚結願曲赦河北一不問罪詔可還除內史賜第一區脊禮卓異會有疾薨年七十一后爲舉哀廢朝贈文昌右相謚曰文惠在位常以進賢爲務卒以所薦張柬之桓彥範敬暉姚崇等光復中興前後奏對凡數萬言開元中北海李邕撰爲別傳備載其詞中宗加贈司空睿宗追封梁國公子光嗣聖曆初爲司府丞自薦爲地官員外郎以稱職聞后嘗許以祁奚歷淄許貝三州刺史母喪固辭奪服終揚州長史景暉官魏州司功叅軍貪暴爲虐民苦之囚共殺仁傑生祠至元和中田弘正始奏葺之血食不絕

冊曰信而後諫一語難欺北斗以南孰匪所師若李若吉

諫則有之已德或慚主意難移倚嗟梁公天鑒在茲

張柬之字孟將襄陽人少涉經史尤好三禮入太學祭酒令狐
德棻異其才目爲王佐登第調清源丞永昌元年賢良對策擢
居首等年七十餘授監察御史聖曆初遷鳳閣舍人嘗論三年
之喪王元感定著三十六月柬之駁從二十五月澹而釋服至
今從之武后欲爲武延秀納突厥默啜女奏自古天子無取外
裔女者疏入忤旨出爲合州刺史轉蜀州表言姚州地險瘴茂
發兵戍到屯輒死請罷置郡后不納俄爲荊州長史長安中后
語狄仁傑欲得一奇士用之對曰陛下求文章資歷今宰相李
嶠蘇味道足矣若以文士齷齪不足與成天下之務臣敢爲張
柬之其人雖老宰相材也用之必盡節於國卽名爲洛州司馬
他日又問仁傑曰臣嘗薦柬之尚未用后曰已遷矣對曰臣本

薦以爲相。非爲司馬。乃授司刑少卿。遷秋官侍郎。姚崇亦論其
沈厚有謀。能斷大事。卽日召見。拜鳳閣侍郎同平章事。首謀誅
二張。以羽林大將軍李多祚。素慷慨可動。以義問曰。將軍居北
門。幾年矣。荅曰。三十年。然則今日擊鐘鼎食。貴重當世。非大帝
恩乎。泣曰。死不敢忘。東之曰。旣知感恩。必思以報。今東官乃大
帝子。迫於嬖豎。宗社廢興。將軍寧有意乎。多祚仰天泣曰。自誓
曰。苟益王室。惟公所使。東之遂定謀。同引李湛。楊玄琰。薛思行。
桓彥範。敬暉。咸爲左右羽林將軍。屬以禁兵。共圖其事。制玄武
門。因陳祕計。中宗復位。擢天官尚書。同鳳閣鸞臺三品。同漢陽
郡公。各實邑五百戶。兼脩國史。三思與韋后。慮楊帝聽譏。咸加
特進。封本郡王。各罷政事。東之表求養疾。授虢州刺史。帝賦詩
祖道。詔羣臣餞。定鼎門外。至州持下。以法雖親舊。無所縱貸。壘

石爲隄以障漢水閩境賴之俄貶新州司馬憂憤而卒年八十
二爲人剛直不傅會尤達於學論次書數十卷于愿襄州刺史
湣著作佐郎景雲元年贈中書令謚曰文貞授孫楚朝散大夫
建中初加贈司徒多祚本鞅鞬酋黃頭都督驍勇善射以功
累右鷹揚大將軍討黑水靺鞨擊破其衆又討室韋及孫萬榮
以勞改右羽林軍及是封遼陽郡王食邑八百戶子承訓衛尉
少卿帝祠太廟特詔與相王登典夾侍後懼禍陽厚韋氏節愍
誅三思率兵至玄武樓不肯戰楊思勗挺刃斬其婿羽林中郎
將野呼利兵因沮潰害多祚及其二子籍沒其家景雲初追復
官爵并宥家屬

田曰重昏漸離昧爽將旦反日之功計壽可算始驗天心
必諧人願驚極可傾斯文不斷

恒彥範字士則潤州丹陽人祖法嗣雍王府諮議參軍終弘文館學士彥範自少俊爽以門蔭調右翊衛聖曆初除司衛寺主簿仁傑厚禮貌之語曰君性慷慨才敏當自光大母卹于初轉擢監察御史遷中丞長安中爲司刑少卿嘗言大理所懸人命不可便辭詭合以希苟免張昌宗引妖人李弘泰占言不軌宋璟請付三司窮治其姦后以嘗自歸不許諫曰昌宗謬恩苞禍皇天降怒自隨其咎正以防事暴之曰求免責耳倘未敗露則候時爲逆此凶詭之臣營惑聖心不可縱成其亂不納自是凡所奏議多逢詰責辭色無撓爭執愈厲又奏赦文明後得罪諸人及諸謀逆魁首疏凡十上詞旨激切卒見聽及謀誅二張母勉以忠孝不並立當義先國家神龍元年正月后方在迎仙宮長生殿卽斬易之等廡下后聞變遽起彥範頓首請死言諸將

誅逆臣恐漏大謀不敢豫奏后顧中宗豎子已誅可卽還宮彥範直前奏太子不可徒返往天皇棄羣臣托愛子久居東宮羣臣不敢背廓清內難天意人事咸歸李氏惟陛下圖之使天位萬世不絕實四海萬民大幸后乃卧不復言明日論功進侍中封譙郡公時帝臨朝使皇后施帷殿上預聞政事乃上書歷舉詩關雎舜皇英周任姒桀妹喜魯齊姜以爲勸戒且言自古王者謀及婦人皆破國亡身傾軔敗幣以陰乘陽違天不祥以婦凌夫悖人害義伏願上以社稷爲重令皇后深居宮掖克脩陰教以輔佐天子又聞番僧慧範託邪法詭惑出入禁與瀆撓朝政陛下嘗輕騎微服數幸其寺上下汗慢君臣虧替不急誅且有變帝性暴昏狃于左右不能有所省納方降墨敕除鄭普思祕書葉靜能祭酒復執論陛下始復位詔軍國皆用貞觀故

事時則魏徵處世而顏師古爲祕書孔穎達爲祭酒如普思等
方伎猥下安足繼蹤前烈臣恐物議謂陛下官不擇才以天秩
加私愛不聽月餘加特進封扶陽郡王賜姓韋同后屬籍資以
金銀錦綵與五王皆賜鐵券恕十死雖外示優崇而實奪其權
尋又出爲涪州刺史改濠州王同皎謀誅三思事洩誣與五王
同逆陰令鄭愔上變貶濠州司馬奪其勳封三思又托諸名榜
韋后殲行於道帝震怒命御史大夫李承嘉鞠狀希旨奏五人
暴誦假以廢后實欲危君罪當誅大理卿裴談請卽處決籍沒
其丕李朝隱執奏未經鞠訊恐有誣讎乃因券文許不死命長
流瀼州各禁錮終身徙家屬嶺外擢承嘉金紫光祿大夫封襄
武郡公賜錦綵進談刑部尚書而貶朝隱三思慮其復用諷太
子請夷三族帝不從遣其黨周利貞至貴州杖殺之時年五十

四容宗卽位並追復官爵賜實封二百戶還其子孫諡曰忠烈
開元六年並配享中宗廟庭建中三年加贈司徒生平工屬文
然不甚好書所志惟忠孝大略居常若不能言及議論奮發百
屈不撓給立範官至常州刺史臣範工部侍郎

敬暉字仲曄絳州平陽人弱冠舉明經聖曆初除衛州刺史河
北新遭敵寇方秋役民脩城縱使歸斂闔部賴安遷夏官侍郎
出爲秦州刺史改洛州長史武后幸長安爲副留守以治幹聞
聖書勞獎賜物段長安二年授中臺右丞誅二張就東宮迎中
宗至立武門斬關而入事完加金紫光祿大夫侍中平陽郡公
又進齊國公表請降諸武王爵爲公三思憤怒俄加特進封本
郡王罷其政事忿反受制於椎牀恨恨彈指流血尋貶崖州司
馬再流瓊州亦爲利貞所害睿宗追復官爵贈秦州都督諡曰
弘簡

肅愍建中初加贈太尉

崔玄暉博陵安平人本名華少以學行稱叔父行功器之舉明經爲高陵主簿父行謹劾蘇令母盧氏有賢操常戒子曰吾聞娥兒屯田郎中辛玄馭云凡爲仕宦者人言貧乏不能存此好消息若聞貲貨盈衍此惡消息吾嘗以爲確論所歷仕宦悉遵慈訓以清謹見稱丁內外艱哀毀盡禮有甘露降庭樹後爲庫部員外郎遷鳳閣舍人長安元年超拜天官侍郎介不受謁執政忌之改文昌左丞不踰月還舊官厚賜綵物進授鸞臺鳳閣二侍郎同平章事兼太子左庶子開陳酷吏誣枉后感悟原洗所籍數百家又助宋璟劾張昌宗不執事時弟昇爲司刑少卿執論大辟兄弟皆守正后久疾累月不見奏言皇太子相王皆仁明孝友宜侍醫藥不宜引異姓出入禁闥后愍納之二張誅

拜中書令封博陵郡公俄進本郡王檢校益州長史貶白州司馬再流古州道卒年六十九追謚文獻建中初贈太子太師其家族三世不異居與昇極相友愛。從皆寄郊墅自遠會食他無別爨貧孤者撫養教勵後雖秉權不使子弟越資仕進時稱重之晚專意經籍以述作爲事所撰行已要範十卷友義傳十卷義士傳十五卷訓注文館辭林策二十卷 子璩亦有文歷中書舍人終禮部侍郎昇至尚書左丞

袁恕已滄州東光人仕累司刑少卿知相王府司馬預誅二張從相王統南衙兵備非常以功加銀青光祿大夫中書侍郎同三品封南陽郡公常論將作少匠楊務廉歷位九卿不聞忠言嘉謨而專事營構以工巧媚上不斥之亡以昭德左授陵州刺史未幾拜恕已中書令特進南陽郡王例罷政事貶爲賓州司

馬再流環州爲利貞所殺建中初贈太子太傅追謚貞烈開成三年文宗訪中丞狄兼謩言五王遺烈詔求其後擢玄暉曾孫鄧爲監察御史暉曾孫元膺爲通事舍人河南縣丞東之四世孫憬壽安尉恕已曾孫德文校書郎惟彥鮑後無聞云

開口桓桓君子匡復是崇功昭社稷名著鼎鑪彼產彼祿乘后告終上陽初啟季杲徒逢天未安劉勃是川內

唐休璟名璿以字行京兆始平人曾祖規後周驃騎大將軍封安邑縣公祖宗隋朔方郡丞以不從梁師都舉兵被害休璟少力學授易於馬嘉運傳禮於賈公彥舉明經高第調吳王府典籤改營州戶曹參軍本起儒者號知兵事值突厥誘奚契丹叛都督周道務授以兵破之於獨護山斬馘甚多遷朔州長史永淳中突厥圍豐州都督崔智辯戰死朝廷議棄豐專保靈夏疏

言豐州控河遏寇號爲襟帶秦漢以來常郡縣之土田良美宜
耕牧隋季喪亂不能堅守乃遷就寧慶始以靈夏爲邊戎羯得
以乘利交侵唐初募人以實之西北一隅得以完固今而廢之
則河傍之地復爲賊有靈夏亦不足自安非國家利也高宗從
其言垂拱中遷安西副都護會吐蕃破焉耆總管韋待價失利
命收潰亡以完西土授靈州都督自碣石踰四鎮其間綿地萬
里山川夷險障塞之要皆能言之行師料敵未嘗敗衄復上方
略前復四鎮武后遣王孝傑拔龜茲等城其所倡也聖曆中轉
涼州都督兼御史大夫持節隴右諸軍副大使吐蕃大將麴
布支率騎數萬寇涼州入洪源谷休暎臨高望之見其旗錯飾
明謂麾下曰吐蕃自欽陵死贊婆降莽布支新將兵欲以示武
其騎雖精皆貴臣酋豪子弟未嘗習戰吾爲諸君取之乃被甲

先登六戰皆克斬二將獲首二千五百築京觀而還吐蕃請和
宴之使者屢覘休璟后問對曰洪源之戰至今尚懼其勇故願
識之后睦異連授右武威金吾二衛大將軍長安中西突厥烏
質勒失和舉兵相攻詔與宰相計議選盡所當施行者其應接
兵馬程期與邊臣所請無異后恨見川之晚進夏官尚書同鳳
閣鸞臺三品后以練習邊情謂楊再思李嶠姚元崇等十不當
一改太子右庶子仍知政事會契丹又警復拜幽營都督安東
都護將行中少復皇太子啟以易之兄弟恩寵過幸願加防察
復位名授輔國天將軍同中書門下三品封酒泉郡公語以前
日之言今未忘也尋授特進右僕射加封宋國公賜實戶三百
又遷吏部尚書景龍二年致仕年已八十尚冀進用爲子娶尚
宮賀婁氏養女復起爲太子少師監脩國史時譏議之景雲初

又爲朔方行軍大總管備突厥停舊封別賜百戶復請老給一品全祿卒年八十六贈荊州大都督謚曰忠其當國無大毗益而能贍給宗族又營塚以葬五服親之無後者人咸感之子先慎襲爵至陳州刺史先擇右金吾衛將軍

張仁愿華州下邳人本名仁亶少有文武林略累官監察御史同列郭弘霸稱后爲彌勒佛身舍人張嘉福請以武承嗣爲太子咸邀與聯章正色拒之尋監王孝傑軍奏其誣罔免官擢侍御史又按御史孫承景冒附軍功得遷中丞貶之卽命仁愿以代仍檢校幽州都督勒兵邀默啜矢著其手后遣使勞問賜藥傳注遷并州長史中宗還位進左屯衛大將軍兼洛州長史有政績凡捕殺盜賊皆積府門畿甸震懾無敢犯者與賈敦頤齊名民間語曰洛有前賈後張可敵京兆三王其見稱如此神龍

三年突厥敗朔方軍總管沙吒忠義命攝御史大夫代領其衆
既至已去引兵踵擊夜掩其營破之始朔方與突厥以河爲界
北星有拂雲祠每入寇必先謁神祭禱然後料兵渡河會然吸
悉兵西擊突厥施娑葛仁愿請乘虛取漠南地於河北築三受
降城首尾相應以絕其南寇之路唐休璟謂自兩漢來皆北守
黃河今於敵腹中築城勞師費功終爲所有仁愿固請中宗竟
從之表留滿戍兵以助功逃歸者禽斬之軍中股慄六旬而三
城就以拂雲爲中城直朔方西城直靈武東城直榆林相距各
四百餘里其北乃大磧也斥地三百里而遠又於牛頭朝那山
北置烽候千三百所自是突厥不敢踰山牧馬朔方益無寇患
減鎮兵數萬歲損費巨億或問何以不置塞門及却敵戰格之
其對曰兵貴攻賤守寇至當併力出拒敢回望者斬何事此其

後代者常元楷始置議者輕之景龍二年拜左衛大將軍同中書門下三品封韓國公歲以春還朝秋復督軍備邊帝爲賦詩祖道賞賚不貲遷鎮軍大將軍睿宗立許致仕加兵部尚書俸祿全給開元二年卒贈太子少保其爲將號令嚴明將吏信伏按邊擇師賞罰必直功罪後人思之爲立祠受降城師出輒享焉名與李靖郭元振唐休璟齊復善知人在朔方奏用御史張敬忠何鸞長安尉寇泚鄆尉王易從始平簿劉體微分總軍事太子文學柳彥昭爲管記義烏尉晁良真爲隨機後皆著稱至大官子之輔至趙州刺史敬忠累遷吏部郎中開元七年拜平盧節度使

冊曰中宗曠世始運此謀無端休璟幾於妄投

崔湜字澄瀾祖仁師官侍從別有傳父挹國子祭酒湜第進士

擢累左補闕預脩三教殊英遷殿中侍御史神龍初轉考功員外郎方五王得政畏武三思讒構引爲耳目使伺察動靜其心反異潛以謀告三思與相阿比驟遷中書舍人勅令速殺五王以絕人望乃進其外兄周利貞三思德之景龍二年遷兵部侍郎父挹禮部侍郎父子同列唐所未有內又附上官昭容伺出外宅與之宣淫中宗遇之甚厚連拜中書吏部侍郎同平章事與鄭愔同典選招納賂遺銓品無序御史李尚隱劾奏貶江州司馬上官與安樂公主從中申護改襄州刺史未幾入爲左丞韋后臨朝仍復相位睿宗立出爲華州刺史俄進太子詹事追論景龍中獻策開南山新路以通商州水陸之運加銀青光祿大夫景雲中又附太平公主引爲同中書門下三品先天元年拜中書令陰與至忠等謀害東宮玄宗不知數至其第以申款

密時爲危之客陳振鷺獻海鷗賦以諷善而不納會將誅肅至
忠等復召湜託爲腹心弟澄諫以上有所問慎無隱湜不從及
見帝對問失旨坐徙嶺外新興王晉臨刑歎謂此本湜謀奈何
反死湜反生宮人元氏亦稱與湜同謀進酖始追及荊州賜死
年四十三生平蚤有才名兼美姿儀與弟液澄從兄澄並居文
翰要路自比東晉王謝謂入仕歷官未嘗不爲第一丈夫寧先
見早識以制他人無寧默默受制於人卒以是敗執政時年三
十八嘗暮出端門緩轡諷詩張說見之歎曰文與位固可致其
年不可及也湜初在襄與譙王數相問遺王敗當死賴劉幽求
張說護免及爲相與幽求爭權陷流嶺表密諷利貞殺之不克
又與太平謀逐張說其貪鄙險毒萃于一門雖螫虺不若挹爲
戶部尚書告老數請託其子多不從 液字潤甫工五言詩官

至殿中侍御史亡命郢州作幽征賦以見意詞甚典麗遇赦還卒有文集十卷子論有吏幹天寶中爲櫟陽令遷司勳員外郎出爲濠陽太守以治行稱大曆末遷同州刺史轉衢州終大理卿澄本名滌多智辨善諧譖玄宗在藩素與欸密卽位寵昵甚周爲祕書監累遷金紫光祿大夫封安喜縣子卒贈兖州刺史

史

蕭至忠沂州人祖德言官祕書少監別有傳至忠少歷伊闕洛陽二尉人稱清謹與之約不失信除監察御史以附武三思起遷吏部員外郎神龍初擢御史中丞嘗論劾蘇味道賊濫及祝欽明竇希玠李承嘉等罪戾百寮震悚遷吏部侍郎其掌選恃勢無所忌憚杜絕請謁威風大行俄三思被誅其黨宗楚客冉祖雍上變言相王與節愍太子有謀中宗欲按之至忠泣奏往

者相王因天后立爲太子不食累日請迎陛下天下聞其有讓
今陛下貴爲天子反不能容一弟耶帝信而止尋授中書侍郎
同平章事上疏陳時政大略言濫官恩倖俄進侍中監脩國史
拜中書令介于楚客巨源再思之間不務詭隨時望歸之帝每
言至忠憚我常以殤女與韋后亡弟洵冥婚又以愛女妻后舅
崔從禮子兩家合禮帝主蕭后主崔時謂天子嫁女皇后娶婦
唐隆元年坐后黨應死太平公主爲言出爲青州刺史治有風
采然毀遣大臣來朝遠巡畏俯太平寢川事復自附納求還京
職主度能助已爲請于帝拜刑部尚書右御史大夫再遷吏部
先天二年復爲中書令封鄭國公參主逆謀主敗逃遁南山捕
誅之籍其家珍寶不可計爲人始以閒敏見推居常不喜賓客
以節儉自高外方直而內圓活觀時輕重以爲去就宋璟見其

出入主第面相規鑒不能自返蔣欽緒又歎九世卿族一舉而滅誠爲可哀亦不聽卒以及禍弟元嘉工部侍郎廣徵工部員外郎

韋巨源安石同系曾祖總後周京兆尹勛國公祖貞伯襲爵入隋改舒國至尚衣奉尉巨源武后時授司賓少卿轉司府卿文昌右丞遷夏官侍郎同鳳閣鸞臺平章事有吏幹勾校省中遺隱下符欽克頗收其利下多怨苦俄坐李昭德累貶麟州刺史復起爲地官尚書神都留守神龍初封同安縣子轉吏部尚書同中書門下三品以脩垂拱格及格後勅二十卷進爵郇縣伯秉筆當除要官十人楊再思得其一其餘皆授諸宰相近屬再思自謂誠負天下未幾避安石親罷遷侍中加爵舒國公一意攀援與后族叙昆弟附屬籍三思貝州封戶悉以蠶稅代秋租

民目流移又倡爲妄言后衣笥有五色雲此非常佳瑞請布告中外大赦天下乘帝昏惑偕宗楚客迦葉志忠鄭愔趙延禧等朋黨取媚陰導韋氏行武后故事景龍三年拜左僕射復知政事進尚書令南郊請后亞獻已爲終獻大臣女爲齋娘及誅韋庶人爲亂兵所殺睿宗贈特進荊州大都督

趙彥昭字奐然甘州張掖人父武孟少游獵償母所獲母泣曰

吾安望此由是感激遂力學淹該書記自長安丞爲右臺侍御

史著河西人物志十卷彥昭少豪邁風骨秀爽以文詞著名及

第調南部尉轉新豐丞與郭元振薛稷蕭至忠善擢爲左臺監

察御史中宗累遷中書侍郎同平章事兼脩國史充脩文館學

士睿宗立出爲宋州刺史坐累貶歸州俄授涼州都督爲政清

嚴部下股慄入爲吏部侍郎拜刑部尚書兼御史大夫持節按

邊元振稱其先時嘗密謀圖至忠有功封耿國公實封百戶侍御史郭震論劾舊事以始事女巫趙氏嘗與其妻一同婦服乘車偕謁因得宰相姚崇又惡其人貶江州別駕卒

則曰亂之始生穢祇吮癰亂之又生降此鞠訥君父子夫一不相容貪天之禍再無比蹤

劉幽求冀州武強人聖曆中登制科調閬中尉棄官去改朝邑尉嘗恨五王不誅三思終無葬地果如其言及臨淄王謀誅韋庶人遂參大策是夜號令詔敕一出其手以功授中書舍人參知機務爵中山縣男實封二百戶授二子五品官二代俱贈刺史睿宗立進尚書右丞加封徐國公增封戶至五百賜物千段奴婢二十甲第一區良田千畝金銀雜物稱是景雲二年遷戶部尚書罷知政事月餘轉吏部拜侍中賜以鐵券特免十死先

天元年拜右僕射同中書門下三品監脩國史頗自矜其功在
諸臣右與竇懷貞崔湜不協已而湜等附太平公主謀逆幽求
復與張暉定計使說玄宗若不早圖且產大害太上何由得安
臣請督羽林兵除之帝許而未發會有漏言於侍御史鄧光賓
帝懼事發併及先自首伏睿宗下幽求等獄効其以疎間親罪
應死帝密爲申救乃流之封州光賓緡州明年太平公主誅卽
日召復舊官知軍國事還封戶賜錦衣一襲開元初進左丞相
兼黃門監未幾除太子少保罷政事爲姚崇所忌癸與鍾紹京
失職失望有怨言詔有司鞠治貶睦州刺史歷杭郴二州悲憤
卒于道年六十一贈禮部尚書諡文獻配享睿宗廟建中中
追贈司徒

鍾紹京贛人初爲司農錄事以善書詔直鳳閣武后署諸官殿
以新錄

明堂及銘九鼎皆其筆也。景龍中轉苑總監會計羣庶人夜中帥戶奴丁夫刀鋸百人以從事。平夜拜中書侍郎封潁川郡公。參知機務。明日進中書令加封越國公實戶五百。養賜與幽求同遣使分行諸道宣諭。仍往均州慰勞。熊王旣得志以賞罰自肆。當時惡之。因上疏讓官。睿宗用薛稷謀進戶部尚書加光祿大夫。玄宗改太子詹事。尋貶果州刺史。削封邑與幽求各留百戶。又坐他事貶懷恩尉。悉奪階封。再遷溫州別駕。十五年入朝。見帝泣奏。陛下忘疇昔事耶。恐使棄死草莽。且同時立功者。今骨已朽。惟獨臣在。陛下不垂愍乎。帝惻然。即日授太子右諭德。久之遷少詹事。年踰八十卒。生平嗜書。盡藏義獻。還良真跡。至數十百卷。建中中追贈太子太傅。

崔日用博陵望族。徙滑州靈昌。擢進士爲芮城尉。大足元年武

后幸長安宗楚客委以類時餽獻豐甘薦握新豐尉陰附安樂
公主遷監察御史神龍中劾奏鄭普思納女後宮中宗初不省
廷爭切至普思因得罪復陰結諸武職拜兵部侍郎宴內殿酒
酣起爲回波舞求學士卽詔兼脩文館帝崩韋后專制畏禍及
更因僧普潤道士王曄私謁臨淄王以自託且密贊大計王曰
謀非計身直糾親難爾日用曰至孝動天舉無不克然利先發
否則必貽後憂及韋氏平夜詔權雍州長史以功授黃門侍郎
參知幾務封齊國公賜實戶三百月餘與薛稷忿競罷政事歷
楊汴兗三州刺史娶荆二州長史入奏計因言太平公主逆節
有萌陛下往以官府討罪勢須謀與力併今據大位一下制書
定矣帝畏驚太上皇奈何對曰庶人之孝承順顏色天子之孝
惟安國家定社稷若今姦宄竊發以亡大業可謂孝乎請先安

北軍而後捕逆黨於太上皇固無所驚帝納之及討蕭至忠竇
懷貞復權雍州長史以功益封二百戶進吏部尚書求復相不
得帝誕日采詩大小雅二十篇借以諷諭及獻司馬相如封禪
書勸告成事手詔褒荅賜以衣物示無言不酬之義久之坐兄
日知累出爲常州刺史例減封戶三百徙汝州開元七年復食
二百戶徙并州長史卒年五十并人懷其惠吏民皆縞服送喪
贈吏部尚書謚曰昭再贈荊州大都督日用才辯絕人敏于事
機嘗語人曰吾平生所事皆適時制變乘機反禍以取富貴不
專始謀每一反思若芒刺在背子宗之襲封亦好學寬博有
風檢與李白杜甫以文相知日知字子駿少孤貧力學以明
經進至兵部員外郎爲魏元忠朔方判官以健吏稱遷洛州司
馬會譙王重福之變官司皆逃獨率吏卒助屯營兵擊賊以功

加銀青光祿大夫遷殿中少監建言廐馬多請分牧隴右省關
畿芻調投荊州長史四遷京兆尹封安平縣侯坐賊貶欽縣丞
歷殿中監進中山郡公改左羽林大將軍俄授太常卿終潞州
長史謚曰襄

郭元振名震魏州貴鄉人以字顯少有大志與薛稷趙彥昭同
入太學家送貲錢舉以資貧人葬無少吝年十八登進士爲通
泉尉任俠使氣擿去小節餉遺賓客百姓苦之武后召欲詰與
語反奇之索所爲文上寶劍篇覽之嘉歎示學士李嶠等卽授
右武衛鎧曹參軍進奉宸監丞會吐蕃乞和其酋論欽陵請罷
四鎮兵披十姓之地乃以元振充使因覘敵情還上疏曰國家
所患惟吐蕃默啞今皆和附若圖之不審直遏其意害且隨之
必甚於前宜以策緩之使其和望勿絕而惡不得萌夫患在外

者十姓四鎮患在內者甘涼瓜肅向三十年關隴屯戍力用困竭脫甘涼有警豈堪廣調發耶善爲國者先料內以敵外不貪外以害內欽陵以四鎮近已畏我侵掠此吐蕃之要然青海吐渾密邇蘭鄯易爲我患亦國家之要今宜報欽陵曰四鎮本扼諸蕃使分其力不得併兵東侵今委之則蕃力益強易以擾動若果無東侵意當以吐蕃青海故地歸於我卽俟斥部落亦還吐蕃如此足杜欽陵之口而和議未絕且四鎮久附其倚國之心豈與吐蕃等今未知利害情實而分裂之恐傷諸國意非制御之算其吐蕃僉戍已久咸願解和以欽陵故未歸款陛下誠能歲發和親使以離間欽陵則其下必怨設欲大舉決有不能后然其計數年間吐蕃君臣果相猜攜卒誅欽陵其弟贊婆等來降因詔元振與河源軍大使大蒙令卿率騎往迎還授主客

郎中久之突厥吐蕃聯兵寇涼州拜爲涼州都督州之輪廣纔
四百里賊來竟傳城下元振始於南硤口置和戎城北磧置白
亭軍約束要路拓境千五百里自是州無寇憂又遣甘州刺史
李漢開闢屯田盡水陸之利收稻豐衍支府十年凡治五歲善
于撫御寒夏畏慕令行禁止道不舉遺河西諸郡置生祠揭碑
頌德神龍中遷左驍衛將軍安西大都護西突厥烏質勒款塞
請和其人已老元振卽牙帳與計事會大雨雪不勝寒而死其
子娑葛疑以計殺其父謀勒兵襲擊副使解琬知之勸令夜遁
元振不聽明日素服往弔道逢娑葛兵遂不敢逼揚言迎衛進
至其帳哭之弔贈禮畢仍留數日爲助喪事娑葛感義更獻馬
駝牛羊項之兼金山道行軍大總管烏質勒之將闕啜忠節與
娑葛交怨屢相侵而兵弱不支元振請追闕啜入宿衛徙部落

置瓜沙間詔許之經略使周以悌教闕啜以重寶賂宰相無入
朝且請發安西兵導吐蕃以擊娑葛求阿史那獻爲可汗以招
十姓使郭虔瓘往拔汗那蒐其鎧馬以助軍旣得復讐部落更
存闕啜然之卽勒兵擊于闐城獲金寶及生口遣人間道遣宗
楚客紀處訥使就其謀元振上疏備言非便不聽楚客等因遣
攝中丞馮嘉賓持節按撫闕啜御史呂守素處置四鎮以牛師
獎爲安西副都護領甘涼兵召吐蕃併力擊娑葛娑葛怒卽出
安西掇換焉耆疏勒兵各五千騎擒闕啜於計舒河殺嘉賓及
守素於僻城殘師獎於火燒城遂陷安西四鎮路絕元振屯疏
勒水上未敢動楚客復表周以悌代元振且以阿史那獻爲十
姓可汗置軍焉耆以取娑葛娑葛遣元振書言無仇于唐而楚
客等受闕啜金欲加兵擊滅我故懼死而鬪且請斬楚客元振

奏其狀楚客大怒誣元振有異圖名將罪之其子鴻聞遁入秦
乞留定西土不敢歸京師以憐乃得罪流白州而赦樊葛睿宗
立名爲太僕卿將行安西會長勢而哭送景雲二年進同中書
門下三品遷吏部尚書封館陶縣男先天元年爲朔方軍大總
管築豐安定遠城至今賴之明年以兵部尚書復同三品太平
公主誅睿宗御承天門諸宰相走伏外省獨元振總兵扈帝事
定宿中書者十四夕乃休進封代國公實戶四百賜一子官物
千段俄兼御史大夫玄宗初講武驪山旣三令帝親鼓之元振
遽奏禮止帝怒軍容不整引坐轡下將斬之劉幽求張說扣馬
諫有大功雖得罪當宥乃赦死流新州開元元年起饒州司馬
怏怏不得志道病卒年五十八贈太子少保父愛年老尚在拜
齊州刺史致仕距國初仕至宰相而親在者惟元振云

蘇瓌字昌容武功人曾祖威附僕射祖夔隋鴻臚卿父最貞觀中爲台州刺史瓌擢進士補恒州參軍母喪哀毀加人左庶子張大安表舉孝悌擢豫王府錄事參軍武后臨朝以忤來俊臣連外徙歷朗歙二州刺史考課爲諸郡最久之轉揚州長史單身被殺自將前任者不能及徙同州刺史歲旱奏宿衛不可闕當翻上者宜月增半糧俾相給足又請却進獻罷營造不急者后不見省時十道使括天下亡戶逃籍者懼轉入旁郡更相度蔽瓌請罷使專責州縣豫立簿籍歲一括實務使同日檢正盡一月止以免勞弊后又鑄浮屠廢損浩廣請併寺署僧常員數缺則補后善之神龍初入爲尚書右丞封淮陽縣男以明曉法令多識臺省舊章特命剛正律令格式遷戶部尚書奏所管戶六百一十五萬六千一百四十一尋加侍中留守京師時鄭

普思以妖幻惑上。支黨徧岐隴間。煽誅爲亂。羣后又寵其妻弟五氏。出入禁中。環捕繫窮。訊之。有詔勿治。環廷爭不可。帝猶依違。司直范獻忠進曰。環大臣。不能先誅。後報其罪大矣。請先斬。環僕射魏元忠頓首言。環忠懇普思法。不容追。帝不得已。流普思儋州。餘黨論死。再轉吏部尚書。封本縣侯。景龍三年。拜右僕射。同中書門下三品。進封許國公。監脩國史。邽祭酒祝欽明。皇后亞獻。安樂公主終獻之。議帝不能用時。大臣初拜。官例皆獻食。名曰燒尾。環獨不進。宗晉卿因侍宴。嘲之。環曰。宰相調和羹。理今粒食。踴貴百姓不足。兵衛乏食。臣誠不職。故不敢燒尾。帝默然。及崩。遺詔。羣太后輔少主。知政事。相王爲太尉。輔政。后詔宰相議。禁中。宗楚客曰。太后與相王。有不通問之嫌。不宜輔政。環正色曰。遺制乃先帝意。安得輒改。楚客等怒。遽削之。環稱疾。

不朝韋后敗睿宗卽位進左僕射餘如故景雲元年老病罷爲太子少傅薨年七十二贈司空荊州大都督謚文貞皇太子別次發哀遣令薄葬布車一乘在位悉心奉上履正體道外方內直陳當世病利甚多韋溫始爲汴州參軍以賕被杖及用事憚其嚴訖不敢傷開元中加贈司徒賜其家實封百戶擢中子又左補闕至職方郎中仍配享睿宗廟廷太和中官其四代孫翔文學參軍四子冰虞部郎中 頌字廷碩弱而敏悟一覽千言第進士調烏程尉舉賢良異等除左司禦率府胄曹參軍遷監察御史長安中諂覆酷吏冤獄驗發其誣多從洗宥神龍中遷給事中脩文館學士拜中書舍人父子同在禁苑時以爲榮玄宗平內難書詔填委名頌居太極殿後閣口占授之功狀百緒輕重一無所差李嶠辭其思若涌泉吾所不及俄改太常少卿

仍供內職父喪辭起復終制任工部侍郎加銀青階襲父爵未
幾進中書侍郎勞曰陸象先歿朕思其人無易卿者願頓首謝
明日加知制誥及與李久對掌書命詔供政事食自此循以爲
例帝謂前有嶠與味道今又與頴何愧前人亦同稱蘇李時吐
蕃盜邊帝欲自將討之頴諫列三不堪一岐隴凋弊千乘萬騎
供億不涯二蕃戎之性驟往倏來大軍一臨怖震烏散彼出多
方我受其誤三太上皇聞陛下身對劇寇不能無憂蒸蒸之思
何以自安今將相大臣豈無爲陛下宣力者何必親行帝不省
復上言陛下撥定禍亂方當深視高居制禮作樂禪梁父登空
同何至狀天居衽金革屈至尊以爲之敵雖朝鼎夕砧未可以
矜示四彝矧敵情狼顧恐牽連北塞聞六師之行入犯幽并靈
夏南動京師臣故曰居中制勝策之上者會薛訥大破吐蕃俘

獲來獻方止不行有詔立靖陵碑命頌爲文辭以前世帝后無
之事弗稽古不可爲法靖陵旣建祖宗陵寢皆須追立帝納之
開元四年進紫微侍郎同平章事脩國史父子咸與宋璟共政
相得歡甚每推璟長或敷奏有未及輒助成之有不曾意更於
帝前申璟所執帝故未嘗不從璟嘗語人先僕射長厚白是國
器若獻可晉否事至卽斷盡公忘私則今丞相過之八年罷爲
禮部尚書俄檢校益州長史按察節度劔南諸州時方彫弊治
尚簡靜招還流亡收斂南山澤鹽鐵給贍軍人募戍輸糧直閒
井置鑑量入計出仍分所贏市穀以廣見糧奏罷前司馬皇甫
恂所市錦半臂琵琶捍撥玲瓏鞭或病其忤上意頌曰明主不
以私愛奪至公臣可以遠近廢忌節耶嵩州蠻酋院與吐蕃連
謀入寇獲其謀者移書還之直院羞悔謀遂寢從封泰山詔撰

朝覲碑文選掌吏部選事幾年五十八帝舉哀洛城南罷朝二
日贈右丞相謚文憲生平性廉儉奉廩悉推散諸弟親族備無
長貨與張說文章稱望略等時號燕許大手筆帝愛其文詰令
別錄副本署臣某撰朕當留中遂爲故事其後李德裕著論近
世詒誥惟類叙事外自爲文章云 詵字延言舉賢良高第補
汾陰尉遷祕書詳正學士左司郎中轉給事中出爲徐州刺史
有政迹卒贈吏部侍郎子震自幼彊學有成人風以蔭補千牛
累遷殿中侍御史長安令祿山之難棄家出奔靈武拜御史中
丞遷文部侍郎爲廣平王從征糧料使二京平封岐陽縣公改
河南尹九節度兵敗奔襄鄧貶濟王府長史起爲絳州刺史進
戶部侍郎判度支爲泰建二陵鹵簿使以勞封岐岡公終太常
卿贈禮部尚書

張說字道濟其先自范陽徙河東又遷洛陽父鵬贈丹州刺史說弱冠應制舉對策乙等授太子校書遷左補闕預脩三教殊英武后嘗問氏族歷舉炎帝之姜黃帝之姬始因所生地爲之其後因生以賜姓或以官或以國或以王父之字周褒餘民各以舊國爲姓氏下及兩漢韓陳許鄭魯衛趙魏爲多后善之久視中后避暑三陽宮汜秋求還疏諫宮距洛城百六十里有雉水之隔崿坂之峻過夏秋水潦方積道壞山險不通轉進河廣無梁咫尺千里扈從兵馬日費資饒太倉武庫並在都邑紅粟利器蘊若山丘奈何去宗廟安山谷臣竊不取后不省長安初遷右史內供奉兼知貢舉尋擢鳳閣舍人張易之誣陷魏元忠援以爲助廷對忤旨流欽州歲餘中宗召爲兵部員外至工部侍郎母喪不徇流俗起復論者高之喪畢轉兵部侍郎兼脩

文館學士睿宗卽位拜中書侍郎兼雍州長史詔往東都按視
譙王重福支黨時繫獄人數百久而不決至卽捕獲誅謀主張
靈均鄭愔自餘註誤一切原有帝嘉其不枉直不滯惡非忠正
豈能如此名爲皇太子侍讀尤見親禮所預祕謀密計甚衆踰
年進同中書門下平章事監脩國史景雲二年二月術者言五
日內有急兵入宮帝令備之左右莫對說奏此必讒人謀動東
宮陛下若令太子監國則名分定姦膽破矣帝悟下制如說立
宗卽位以不附太平公主陰謀罷授尚書左丞留守東都因使
者以佩刀獻帝請先決策深加聽納會誅蕭至忠等名爲中書
令封燕國公實封戶二百時因吐蕃入朝命作潑寒胡戲疏論
昔孔子會齊數倡優之罪列國尚然况天朝乎今四裔請和使
者入謁當接以禮樂示以兵威未聞乞寒潑胡出何典故裸禮

跳足汨泥揮木盛德何觀恐非干羽柔遠樽俎折衝之道此戲
遂絕俄與姚元崇不平罷爲相州刺史充河北道按察使又坐
事徙岳州停實封雅與蘇瓌善適頽爲相因作五君詠其一篇
壞事候瓌忌日致之頽覽詩嗚咽未幾見帝陳說忠蹇勲勞不
宜棄外遷荊州長史轉右羽林將軍檢校幽州都督入朝帝大
喜開元七年又移并州長史兼天兵軍大使攝御史大夫明年
朔方王峻誅河曲降蕃阿布思等于餘人九姓同羅拔野固等
皆疑懼說持節從輕騎二十餘直詣其部名見酋豪慰安之九
姓遂安九年峻討蘭池叛寇康待賓詔說同經略時黨項羌亦
連兵攻銀城說將步騎萬人出合河關掩擊破之追北賂施堰
羌寇自相猜夜鬪待賓遁入鐵建山餘衆奔潰說招納黨項奏
置麟州以兵撫之指拜兵部尚書復同三品明年又爲朔方節

度大使親行五城督士馬時慶州方渠降寇康願子白爲可汗
掠牧馬西泚河出塞說進討至木槃山禽之俘獲三千乃議徙
河曲六州殘寇五萬於唐鄧仙豫間空河南朔方地以功復賜
實封時平無事請於邊兵六十萬中掣取二十萬還農上以爲
疑說請以閩門百口爲保帝乃可之又衛兵貧弱番休者亡命
略盡建請一切召募不簡色役優其科條逆逃者必爭來應不
旬日果得勝兵十三萬分補諸衛以彊京師號爲彊騎帝自東
都還將幸并州說奏由河東故時漢武有雕上祠此禮廢濶歷
代莫舉願爲三農祈穀誠四海之福帝納其言過祠后土還復
中書令倡議封禪詔與諸儒草儀多所裁正帝因宴禮官學士
於集仙殿改爲集賢殿又改麗正書院爲集賢書院授說學士
知院等東封詔撰封禪壇頌轉右丞相時左丞相源乾曜不主

封禪與說不協故升壇執事并從者說類引所厚超階五品餘
咸不及又不加賜從兵衆頗怨怒及還宇文融有寵恨諸事爲
所抑與崔隱甫李林甫共奏說引術士王慶則夜禱僧道岸窺
謁時事所親吏張觀范堯臣依勢市權招賂帝怒詔乾曜隱甫
同刑書韋抗理卿胡珪鞠問發金吾兵圍其第說兄左庶子光
詣朝堂刑耳舛免帝遣高力士往視回奏說蓬垢席蓐以瓦器
饋食憂懼自罰因言往侍讀功勤兼效忠國家帝憮然乃祇誅
慶則等及貶謫十餘人停說中書令居集賢院專脩國史每軍
國大務帝輒訪焉隱甫等恐復用巧文詆毀素懷忿者又著疾
邪篇帝聞因令致仕帝初欲事吐蕃說密請講和以休息郅塞
帝曰待王君奭計之後君奭破吐蕃於青海西說策其且敗因
上雋州鬪羊以申諷諭曰使鬪而不解立有死者帝識其意賜

經千匹瓜州後果失守君奭遂死十七年復爲右丞相轉左上
日勅所司供帳設樂內出醪饌帝爲賦詩尋錄脩謁陵儀注功
加開府儀同三司踰年有疾中使候問帝手寫方賜藥薨年六
十四舉哀光順門罷明年元會贈太師謚文貞御製神道碑文
生平持大體敦氣節重然許於君臣朋友大義甚篤三秉大政
述作多出其手所撰文必使視草導帝尊尚經術開館置學士
脩太宗之政善用人才多引後進知名士以左右王化粉澤典
章成一王之法卒爲開元宗臣其文俊麗典雅屬思精密尤長
碑誌世所不逮稱者不以姓著特曰燕公謫岳州後詩益悽婉
人謂得江山之助掌文學三十年國史常隨軍在家脩撰兼職
不離集賢帝欲授以大學士辭曰學士本無大稱中宗過於崇
寵臣不敢復蹈故轍先時每侍宴大官先舉辭以儒臣所貴者

道卽引觴同飲迄今效之徐堅自以學士職閒無益而供候太
厚議白罷之曉曰古者帝王功成則有畋獵之失或興池觀或
尚聲色今上獨崇儒道躬自講論詳延豪俊所費者細所益者
大其言蓋所未達帝聞乃薄堅嘗自爲父碑帝書其額積善之
墓有文集三十卷大曆中配享玄宗廟廷子均均皆能文均
自太子通事舍人遷主爵郎中轉中書舍人說自注其考云父
教子忠古之善訓王言帝載尤難以任庸以嫌疑而撓國禁考
上下時謂不私後襲父爵遷兵部侍郎坐累貶饒蘇二州刺史
自以才當輔相爲林甫所抑復倚陳希烈國忠遷爲刑部尚書
坐貶貶建安太守入除大理卿居常歛望以僞受祿山中書令
應死房琯與苗晉卿營解肅宗顧說有舊免流合浦卒贈太子
少傅子濛事德宗爲中書舍人均尚王叔綬終給事中

冊曰倉卒定功立賢無方從容守文遂懿顯良太平之政
華國之章

弘簡錄卷之十五

終